

[0492] WURD BY IT OFSKIE FAN PROF DR. W.J. BUMA

Der is my frege oft ik by dit ôfskie yn lytse rounte in wurdmannich sizze woe. Ik hie dêr earst wol biswier tsjin om't ik yn it talepraktikum wurkje en sadwaende net sa bot op 'e hichte bin mei de gong fan saken op it ynstitút. Mar op groun fan it feit dat ik de âldste bin fan 'e meiwurkers waerd der ornearre dat my fan 'e middei de eare takaem om in wurd fan wurdearring en tank by dit ôfskie út to sprekken. Dat doch ik graech, om't ik dêrmei de gelegenheit krij om to uterjen hwat my op it herte leit.

Us persoanlik kontakt bigoun doe't ik studearre foar de akte middelber Frysk. Wy krigen les fan Jo, û.o. yn it Aldfrysk, foar ús doe in folslein ûnbikend gebiet. It wie doe al dat ik great respekt krige foar Jou kennisse en Jou wize fan oerbringen fan de stoffe, net allinnich neffens de ynhâld, mar ek hwat de foarm oanbilange. De sfear wie dy fan in freonerounte, mar der waerd fûl studearre. Gysbert Japiks seit: 'Wa tijd naet bruwckt, dy tijd ontglijdt, ontfljuecht, ontduwckt, me wirdse quijt.' Mar dat barde by Jo net. De lessen waerden binut oant de lêste menút ta. It mei my noch heuge dat Jo altyd hurd rinne moasten om op 'e tiid de trein nei Grins to heljen. Geale de Vries wie dat net nei 't sin en hy bea oan om Jo mei syn auto nei it stasjon to bringen. 'Dat is treflik' seine Jo doe, 'dan kinne wy dizze tekst noch eefkes ôfmeitsje.'

Myn Frysk wie net sa bêst. Der rûgele by my wolris in Hollanisme út en sa sei ik in kear op 'e les dat ik tige *enthousiast* wie oer in nij boek. Jo seine dêr freonlik oerhinne dat der mear minsken *út 'e skroeven* wiene. Sa'n wurd as *enthousiast* komt Jo fansels net oer de lippen. Ik haw my wolris ôffrege hoe't it komt dat Jou tael sa geef bleaun is en ik haw dêr ek in forklearring foar foun - Jimme meije dat útlizze as oergunst - : Tweintich jier learaer en like lang direkteur-heechlearaer bûten Fryslân hawwe Jo biwarre foar oantaesting fan Jou taelbisit.

Tweintich jier lang hawwe Jo direkteur-heechlearaer west fan it Frysk Ynstitút en ûnder Jou bitûfte lieding is der gâns wurk forset. Jo hawwe sels ek hiel hwat publisearre, kolleezjes jown, kontakten lein mei it bûtenlân, kongressen taret en foarsitten en neam mar op. Ik sil dêr net oer útwreidzje, om't elkenien yn dizze rounte wol wit dat der hiel hwat dien is en der ek noch hiel hwat aktiviteiten rinne. Mei al dat wurk hawwe Jo in wichtige bydrage levere ta de ûnderbou fan de stúdzje fan it Frysk. Wy wolle dêr ús greate wurdearring foar útsprekke en Jo tige tank sizze foar Jou wurk.

'Lock moat y habbe, Tzjerl' seit Gysbert Japiks. Nou, dat hiene Jo yn de kar fan Jou frou. As in man sa folslein yn bislach nommen wurdt troch syn wurk, moat de oarehelte hiel hwat opbringe. Se moat rêdde mei allerhanne saken, noflike en ûnnoflike, en dêrby hat se to faek "it ryk allinne". Net alle froulju kinne dat oan, mar Jou frou koe dat wol. Se hat it treflik opheind en ik haw der greate



*f.l.n.rj. steande: H. Bloemhoff, B. Sjölin, frou W. Buma-Groen, W.J. Buma, E. Havinga, K. Dykstra, frou A. Bosma-Banning, H. Heeroma, dêrfoar: S. Sybesma, jf. S. v. Dellen, T. Hoekema - (foto 20-12-1976 S. Cordes C.F.D. R.U. Grins)*

biwûndering foar. It is mei oan har to tankjen dat Jo hjir sa fruchtber arbeidzje koene. Wy hoopje dat Jo mei nocht weromsjen sille op dit wichtige tiidrek yn Jimme libben. Fansels wiene der ek toloarstellingen en tobeksetters. De spanningen fan de demokratisearring fan it Heger Underwiis en de agressy en de polarisaesje fan ús tiid binne ek Jo net bisparre bleaun. Mar it is Jo slagge om de wylde weagen del to bêdzjen en dat noch wol sûnder runehoutsjes. Ik haw heard dat der hjir foar Jo in keamer biskikber bliuwt. Dat liket my in ideale wurksitewaesje ta. En fierders komt der tiid foar húslike bezichheden. Jou frou sil Jo dêrby in goede learmasteresse wêze.

By in ôfskie heart in presint en by dit ôfskie hawwe wy in hiel bysûnder presintsje, in stikje wurk dêr't Jo grif wiis mei wêze sille. It stiet yn nau forbân mei Jou wurk op it Ynstitút. It is in ynhâldsopjefte fan alle jiergongen fan *Us Wurk*. Ut namme fan alle meiwurkers mei ik Jo dit gesink oanbiede. Ik forbyn dêr de winsk oan dat der foar Jo en jou frou noch in noflike lêste libbensfaze folgje mei, in soad lokkige jierren.

20 desimber 1976

A. Bosma-Banning